

Oqaluuserisassanut nassuiaat.

(Inatsisartut Siulittaasoqarfiat)

Qinnuteqaatit assigiinngitsut tunngavigalugit ulloq 8. november oqaluuserisassat nutartikkat agguanneqarput:

Imm. 18, Nuummi umiarsulivittaassaq pillugu aalajangiiffigisassatut siunnersuut

Sanaartornermut Ataatsimiititaliaq aappassaaneerinninnissap ataatsimiinnermi ullormut kingullermut nuunneqarnissaanik qinnuteqarpoq.

Imm. 59 Meerartaarnermut atatillugu aningaasaateqarfiliornissamik aalajangiiffigisassatut siunnersuut

Aningaasarnermut ataatsimiititaliap aappassaaneerinninnissap UPA2014-imut nuunneqarnissaanik qinnuteqarpoq.

Imm. 57 Imigassartorpallaarnerup kinguneranik qaratsamikkut ajoquteqalersimasut eqqarsaatigalugit iliuusissanut pilersaarusiortoqarnissaanik aalajangiiffigisassatut siunnersuut aamma **imm. 61** Innuttaasut imigassamik ajornartorsiutillit akeqanngitsumik katsorsartittalernissaannut aqutissiuusinnissamik iliuusissanullu pilersaarusiortoqarnissaanik aalajangiiffigisassatut siunnersuut, Ilaqutariinnermut Ataatsimiititaliap aappassaaneerinninnissap ataatsimiinnermi ullormut kingullermut nuunneqarnissaanik qinnuteqarpoq.

Ulloq 11. november taamatuttaaq oqaluuserisassanut allannguutit uku agguanneqarput:

Imm. 7, 2014-imut Aningaasanut inatsisissatut siunnersuut. Aningaasaqarnermut Ataatsimiititaliaq ulloq 14/11 siunnersuutip pingajussaneerreqannginnera ullunik marluinnarnik sioqqullugu ilassutitut isumaliutissiissuminik tunniussinissamik immikkut akuerineqarnissaminik qinnuteqarpoq.

Imm. 105, Suliassat annertuut pillugit inatsit,

Inuussutissarsiornermut Ataatsimiititaliap qinnuteqarneratigut aappassaaneerinninnissaq novembarip ulluisa 20-annut pingajussaaneerinninnissarlu novembarip ulluisa 27-iannut kinguartinneqarput.

Inatsisartuni Siumup ilaasortaataa **imm. 33, 34** aamma 132 Kim Kielsenimit siunnersuutigineqarsimasut siunnersuuteqartutut tiguaat.

Inatsisartuni Atassutip ilaasortaataa **imm. 124** Siverth K. Heilmannimit siunnersuutigineqarsimasooq siunnersuuteqartutut tiguaat.

Taamatuttaaq **imm. 37, 44, 121** aamma **123** Siverth K. Heilmannimit siunnersuutigineqarsimasut Gerhart Petersenimit Knud Kristiansenimillu tiguineqarput.

Atassutip **punkt 43**, Apeqquteqaat aallaavigalugu oqallisissiatut siunnersuut pineqarluni aatsitassarsiorluni oliesiorlunilu selskabenut nunatta karsianut akitsuusiisalersinnaanissamik pisussaaffiliisinnaanissaq, tassuunakkut iluaqutissat ajoqutaasinnasortaallu aatsitassarsiortunut uuliasiortunut assigisaanullu Kalaallit Nunaanni, tunuartippaa.

Inuit Ataqatigiit qinnuteqarput immikkoortut uku aappassaaneerneqarnissaasa kinguartinneqarnissaannik UPA 2014-mut:

Imm. 83 Dansk Institut for Internationale Studier, DIIS, pillugu aalajangiiffigisassatut siunnersuut, **Imm. 90** Aatsitassarsiorfinni atorineqartussani dieseli ikummatigalugu nukissiuutini atortulersuutit NOx-inik taaguutillit millisaatit atorineqartalernissaat siunertaralugu Naalakkersuisut UPA 14-imut inatsisissatut siunnersuummik saqqummeeqqullugit Inatsisartut aalajangiiffigisassaattut siunnersuut, **kiisalu imm. 63** Atuartuni angajullerni klassinik inuussutissarsiornermi apeqqutini sammisaqartitsinikkut ilinniartitsisoqartalernissaa

siunertaralugu Meeqqat atuarianni peqqussut allanngortinneqassanersoq pillugu apeqquteqaat aallaavigalugu oqallittoqarnissaanik siunnersuut.

Inatsisinut Ataatsimiititaliaq **imm. 35-ip**, pinerluuteqarsimasut singernermikkut nalunaarsuuteqarlutik pineqaatissinneqarsinnaalernissaannik aalajangiiffigisas-saattut siunnersuutip, UPA2014-imut kinguartinneqarnissaanik qinnuteqarpoq.

Imm. 33-ip Avatangiisinut aningaasaateqarfimmik pilersitsinissamik aalajangiiffigisassatut siunnersuutip aappassaaneerneqarnissaata kinguartinneqarnissaanik Eqqissisimatitsinermut Avatangiisinullu Ataatsimiititaliaq qinnuteqarpoq. Siunnersuut ataatsimiinnermi ullormi kingullermi 27. november aappassaaneerneqassaaq.

Andreas Uldumip siunnersuutai napparsimalluni sulinngiffeqarnerani Mikael Rosingimit tiguneqassapput.

Demokraatit qinnuteqarput **imm. 71-ip** Kalaallit oqaasiisa takornartat oqaasiisut ilinnialernissaannut qanoq iliorluta inersimasunik kajumissuseqalersitsinissarput pillugu apeqquteqaat allaavigalugu oqallinnissamik siunnersuutip kinguartinneqarnissaanik UPA2014-mut.

Inuit Ataqatigiit qinnuteqarput **imm. 88-ip**: Naalakkersuisut Aatsitassanut inatsimmut UPA 14-imut allannguutissatut siunnersuummik saqqummi-ussinissamut pisussaaffilerneqarnissaat pillugu Inatsisartut aalajangiussassaattut siunnersuut, taamaalilluni uran aamma thorium atominit qaartartuliornermi atortussiassatut nassuiarneqartussanngorlugit aamma suliareqqitaanatik saffiugassatut (ore) pissuseqartillugit, taamaalilluni inatsimmi atortussiassat radiop qinngornerinik navianartunik akullit atortussiassallu allat ersarissumik immikkoortinneqaleqqullugit, avatangiisinut tunngasutigut piumasaqaatit

eqqarsaatigalugit tamatumani aamma ilanngullugit pīaanermit sinnikorineqartut (tailings) aammalu pīaaffiusimasup matuneqarnerani igitassat.

Ullumimut aappassaaniigassanngortinneqarsimagaluartup UPA2014-imut knguartinneqarnissaanik.

Immikkoortut 60 aamma 137, imm. 71 peqatigalugu ataatsimut oqaluuserineqartussaagaluartut, immikkoortinneqassapput, taamaalilluni **imm. 60**, Apeqquteqaat aallaavigalugu saammaasseqatigiinneq, kinaassuseq, oqaatsit, inuit pisinnaatitaaffii qanorlu iliuuseqarluni inuiaqatigiittut akuunerulersitsisutut inissittutut qulakkeerinninnissaq, sumit kingoqqisuuneq, oqaaserisat kulturikkullu tunuliaqutaq apeqqutaatinngikkaluarlugu inuit pisinnaatitaaffii inuiaqatigiinni inooqatigiilluni pingaartitsineq pillugu oqallinnissamik siunnersuut.

kiisalu punkt 137, Qallunaatut piginnaasaqqaanngikkaluarluni ilinniarfinnut isersinnaaneq qanoq aqutissiuunneqarsinnaava?

Ilinniarfeqarfiit ullutsinni immaqa “pisariaqavinngittumik” qallunaatuunerusoq ingerlasut qanoq kalaallisut ingerlanneqarnerulernissaat anguniarsinnaavarput? Ilinniarfeqarfiit suut siunissami qaninnermi annermik kalaallisut imaluunniit kalaallisuinnaq ingerlalersinnaanerat siunertaralugu oqallinnissamik siunnersuut.

Ulloq 13. november tulleriissillugit immikkullu oqaluuserineqassallutik.

Piffissami ullumi novembarip 12-aniit 14-at ilanngullugu Inatsisartunut ilaasortat:

Juliane Henningsen, Inuit Ataqatigiit aamma Doris Jakobsen, Siumut taasisarnerit pillugit isumaqatigiissuteqarput.